



Broj: 02-04-2-1945/23
Maglaj, 23.11.2023. godine

ZAPISNIK

sa 32. redovne sjednice Općinskog vijeća Maglaj
održane dana 23.11.2023. godine u 16:00 sati u Sali Općinskog vijeća
JU Dom kulture «Edhem Mulabdić» Maglaj

Predsjedavajuća Aida Bašić: Na osnovu člana 59. Poslovnika o radu Općinskog vijeća Maglaj, zaključaka Kolegija od 20.11.2023. godine, otvaram 32. redovnu sjednicu Općinskog vijeća Maglaj

Na današnju sjednicu pozvani su vijećnici iz parlamentarnih političkih stranaka: SDP, SDA, A-SDA, DF, HDZ BIH, i samostalni vijećnici Elvir Vehabović, Mustafa Bešić i Mirza Mešić. Poziv za sjednicu dostavljeni su OSCE terenskom uredu u Travnik, i sredstvima informisanja koji prate rad današnje sjednice Općinskog vijeća.

Pozvan je Općinski načelnik, rukovodioci općinskih Službi, Općinska pravobraniteljica, kao i predstavnici čiji materijali će biti razmatrani na današnjoj sjednici Općinskog vijeća.

Takoder su pozvani i zastupnici u Skupštini Zeničko-dobojskog kantona gospođa Emira Drnda-Čičeklić, gospodin Jasminko Kapić i gospodin Hajrudin Ferić.

Sve vas selamim i pozdravljam i pozivam da svako na sebi svojstven način odamo dužnu počast onima koji su svoje živote ugradili u zemlju, domovinu nam Bosnu i Hercegovinu i svim žrtvama rata.

Prije nego izvršimo prozivku i provjerimo prisustvo vijećnika na ovoj sjednici Vijeća, želim da vas upoznam o dvije informacije koje su bitne za nastavak i rad tokom današnje sjednice. Jedna informacija se odnosi da je na protokol Općinskog vijeća stigao dopis od OO SDA Maglaj u koje stoji da će kao šef Kluba u radu Vijeća umjesto dosadašnjeg Maida Suljakovića, nastupati Adis Abdurahmanović, odnosno biti šef Kluba. To je jedno a drugo se odnosi na dopis od strane CIK-a koji je pristigao na protokol 23.11.2023. godine u kojem nas obavještavaju da je dodjeljen mandat vijećniku u Općinskom vijeću Maglaj Damiru Bašiću, tiče se naravno i vezano je za ostavku gospodina Smailovića. Ja ću zamoliti gospodina Bašića, da dođe za govornicu i da položi svečanu izjavu a vas ostale ću naravno zamoliti da ako može ustanete.

Vijećnik Damir Bašić: Ja, Damir Bašić obavezujem se da ću povjerenu dužnost vijećnika obavljati savjesno i odgovorno, da ću se pridržavati Ustava, zakona, Statuta Općine Maglaj i drugih akata ovog Općinskog vijeća, da ću se zalagati za zaštitu i unaprjeđenje ljudskih prava i sloboda, ravnopravnost naroda i građana i razvoj demokratije u najboljem javnom interesu svih građana općine Maglaj. Te da ću predano obavljati povjerene zadatke u cilju razvoja i napretka općine Maglaj, Zeničko-dobojskog kantona, Federacije Bosne i Hercegovine, države Bosne i Hercegovine.

Predsjedavajuća Aida Bašić: Ja Vas molim da potpišete izjavu i evo ja Vam zvanično čestitam što ste nam se pridružili i želim nam uspješan rad.

Molim predstavnicu Službe Općinskog načelnika i Općinskog vijeća, da prozivkom vijećnika utvrdimo broj vijećnika na 32. redovnoj sjednici Općinskog vijeća.

Današnjoj sjednici Općinskog vijeća prisustvuju 25 vijećnika, konstatujem da Općinsko vijeće može punovažno raditi i odlučivati i donositi Odluke, zaključke i rješenja, čime je ispoštovan član

88. Poslovnika o radu Općinskog vijeća Maglaj. Na današnjoj sjednici izvršit ćemo i verifikaciju zapisnika sa prethodne 31. redovne sjednice Općinskog vijeća i 1. tematske sjednice, ima li primjedbi? Nema, ko je za verifikaciju?

Glasalo za : Svjetlana Zamboni, Elvir Arnautović, Jasmin Đuhera, Arif Mujkanović, Damir Bašić, Anida Šahman, Firuz Galijašević, Senad Šehić, Samir Fetić, Fikret Delić (SDP), Mustafa Bešić (samostalni vijećnik), Aida Bašić (NES). Pero Mamić (HDZ BH), Aida Hadžić (DF), Elvir Vehabović (samostalni vijećnik), Maid Suljaković, Eldin Pehrat, Adis Abdurahmanović, Edin Salatović, Jasmin Begić, Safet Jašić, Mirsad Bejzić, Eldis Kusunur, Edin Osmić (SDA), Mirza Mešić (samostalni vijećnik).

Glasalo protiv: Nema.

Uzdržanih: Nema.

Konstatujem da smo jednoglasno verifikovali zapisnike sa proteklih sjednica. Otvaram raspravu po pitanju Dnevnog reda, da li ima prijedloga za proširenje Dnevnog reda? Gospođine Abdurahmanović pauza može izvolite. Nakon pauze nastavljamo dalje, bilo je pitanje da li ima prijedloga za proširenje Dnevnog reda, gospođa Hadžić izvolite.

Vijećnica Aida Hadžić: Pozdravljam sve prisutne, mi smo prošli put na Kolegiju dogovorili da ćemo promijeniti Dnevni red, odnosno proširiti sa još jednom tačkom, nije bilo nikakvih primjedbi a predlažem da ta tačka bude pod rednim brojem 15 ili 16, iza ovog Izvještaja, da Rješenje o imenovanju Komisije za nadležnost koordinacije i praćenje efekata provedbe propisa pružanja komunalnih usluga i cijena prema krajnjim korisnicima. Vezano za onu Odluku što smo donijeli na sjednici vezano za Komunalno javno društvo, da će Komisija nadgledati ove efekte poskupljenja koje smo uveli, tako da je ovo samo dopuna onog što smo već svi usvojili.

Predsjedavajuća Aida Bašić: Molim Vas, dok ste tu mislim da smo tu predložili komisiju i da bude u sastavu članovi Kolegija.

Vijećnica Aida Hadžić: Pošto su članovi Kolegija, samo će se u članu 1. umjesno Maida Suljakovića, ovo Rješenje izmijeniti i staviti će se Adis Abdurahmanović.

Predsjedavajuća Aida Bašić: Hvala. Da li ima još prijedloga? Na zahtjev Kluba SDP-a pauza prije glasanja. Nastavljamo s radom, gospođine Šehić, želite iznijeti stav izvolite.

Vijećnik Senad Šehić: Zahvaljujem se predsjedavajućoj, dobro veće svima. Iako smo mi u Klubu SDP-a, protiv tačke broj 1. na Dnevnom redu, iako smo za njeno skidanje, jer radi se o da kažem tako populističkoj inicijativi koja od početka samog osuđena na propas, mi ćemo svakako podržati današnji Dnevni red, isključivo zbog interesa građana Maglaja, jer ima ovdje tema koje više ne mogu čekati da odgađamo ovu sjednicu u neko dalje vrijeme. Hvala.

Predsjedavajuća Aida Bašić: Hvala Senade. Ukoliko više nema prijedloga za proširenje Dnevnog reda, stavljam Prijedlog gospođe Hadžić na glasanje. Ko je za?

Glasalo za : Svjetlana Zamboni, Elvir Arnautović, Jasmin Đuhera, Arif Mujkanović, Damir Bašić, Anida Šahman, Firuz Galijašević, Senad Šehić, Samir Fetić, Fikret Delić (SDP), Mustafa Bešić (samostalni vijećnik), Aida Bašić (NES). Pero Mamić (HDZ BH), Aida Hadžić (DF), Maid Suljaković, Eldin Pehrat, Adis Abdurahmanović, Edin Salatović, Jasmin Begić, Safet Jašić, Mirsad Bejzić, Eldis Kusunur, Edin Osmić (SDA).

Konstatujem da trenutno u Sali nisu prisutni gospodin Elvir Vehabović (samostalni vijećnik). i gospodin Mirza Mešić (samostalni vijećnik).

Sa 23 glasa za prihvatili smo proširenje Dnevnog reda sa ovom tačkom. Pročitat ću kompletan Dnevni red.

DNEVNI RED

1. Inicijativa za pokretanje postupka opoziva Načelnika općine Maglaj
2. Izvještaj o izvršenju Budžeta/Proračuna Općine Maglaj za period 01.01. – 30.06.2023. godine
3. Nacrt Budžeta/Proračuna Općine Maglaj za fiskalnu 2024. godinu
4. Nacrt Odluke o izvršavanju Budžeta/Proračuna Općine Maglaj za fiskalnu 2024. godinu

5. Prijedlog Odluke o izmjenama i dopunama Odluke o organizovanju/organiziranju općinskih službi za upravu Općine Maglaj
6. Prijedlog Odluke o davanju saglasnosti na Pravilnik o izmjenama i dopunama Pravilnika o unutrašnjoj organizaciji službi za upravu Općine Maglaj
7. Prijedlog Odluke o davanju saglasnosti za konačno imenovanje direktora KJD d.o.o. Maglaj
8. Prijedlog Odluke o davanju ovlaštenja punomoćniku za zastupanje Općinskog vijeća Maglaj na Skupštini „KJD“ d.o.o. Maglaj
9. Prijedlog Odluke o izmjeni i dopuni Odluke o javnom redu i miru
10. Prijedlog Odluke o istupanju Općine Maglaj iz članstva Regionalne ekonomske zajednice „REZ“ d.o.o. Zenica
11. Prijedlog Odluke o prodaji nekretnine neposrednom pogodbom Jusufbašić (Mahmut) Asimu iz Maglaja, radi oblikovanja građevinske parcele
12. Prijedlog Odluke o izmjenama i dopuni Odluke davanju saglasnosti za pokretanje postupka za dodjelu koncesionog prostora za istraživanje i eksploataciju mineralnog resursa Ierzolita na ležištu „Klanci“ K.O. Strupina, Općina Maglaj
13. Prijedlog Odluke o usvajanju djelimične izmjene Regulaionog plana Novi Šeher po zahtjevu Pervan Zorana
14. Prijedlog Odluke o pristupanju djelimičnoj izmjeni Regulaionog plana „Maglaj-Centar Južni dio“ po zahtjevu firme „AICOMP“ doo Maglaj
15. Prijedlog Rješenja o imenovanju člana Upravnog odbora Javne ustanove „Dom zdravlja“ Maglaj
16. Periodični finansijski izvještaj Budžeta/Proračuna Općine Maglaj za period 01.01 – 30.09.2023. godine
17. Izvještaj o realizaciji zaključaka Općinskog vijeća Maglaj za period 01.05.2023. godine do 31.08.2023. godine
18. Izvještaj o radu za 2022/2023. godinu JU „Dječiji vrtić“ Maglaj sa finansijskim pokazateljima utroška sredstava iz Budžeta Općine Maglaj
19. Program rada JU „Dječiji vrtić“ Maglaj za 2023/2024. godinu
20. Informacija o radu privatnih predškolskih ustanova za 2021/2022.godinu, koje se sufinansiraju iz Budžeta Općine Maglaj sa programom rada za 2022/2023. godinu
21. Informacija o aktivnostima izrade elaborata o zdravstvenom stanju stabala u drvoredima u ulicama Aleja Ilijana i Viteška, općina Maglaj i planiranim aktivnostima u narednom periodu predviđenih elaboratom

Vijećnička pitanja i inicijative.

Ko je za ovakav Dnevni red?

Glasalo za : Svjetlana Zamboni, Elvir Arnautović, Jasmin Đuhera, Arif Mujkanović, Damir Bašić, Anida Šahman, Firuz Galijašević, Senad Šehić, Samir Fetić, Fikret Delić (SDP), Mustafa Bešić (samostalni vijećnik), Aida Bašić (NES), Pero Mamić (HDZ BH), Aida Hadžić (DF), Maid Suljaković, Eldin Pehrat, Adis Abdurahmanović, Edin Salatović, Jasmin Begić, Safet Jašić, Mirsad Bejzić, Eldis Kusur, Edin Osmić (SDA)

Glasalo protiv: Nema.

Uzdržanih: Nema.

Sa 23 glasa za usvojili smo predloženi Dnevni red. Konstatujem da trenutno u Sali nisu prisutni gospodin Elvir Vehabović (samostalni vijećnik), i gospodin Mirza Mešić (samostalni vijećnik).

AD 1. Inicijativa za pokretanje postupka opoziva Načelnika općine Maglaj

Predsjedavajuća Aida Bašić: Prelazimo na tačku 1. Inicijativa za pokretanje opoziva Načelnika općine Maglaj, otvaram raspravu. Gospodin Abdurahmanović, izvolite.

Vijećnik Adis Abdurahmanović: Selamim i pozdravljam sve prisutne i želim nam brz i efikasan rad tokom današnje sjednice. Pošto je Klub SDA pokretač ove inicijative, ja ću ispred Kluba SDA ponoviti stavove, odnosno zbog kojih smio ustvari i pokrenuti ovu inicijativu. Zbog konstatnog kršenja odredaba Zakona o principima lokalne samouprave u Federaciji Bosne i Hercegovine i Statuta općine Maglaj, zatim nepoštivanja i neprovođenja Odluka i zaključaka Općinskog vijeća Maglaj, nepoštivanja odredabama Zakona o budžetima Federacije Bosne i Hercegovine i samovoljnog, netransparentnog i nesavjesnog trošenja Budžeta Općine Maglaj na štetu građana, upitnosti zakonitosti predlaganja akata Općinskom vijeću kao i kršenje niza drugih zakonskih propisa iz oblasti radnih odnosa, javnih nabavki, ekologije i urbanizma. Također jedan od razloga je niz istraga koje nadležni organi i agencije provode protiv istog i potvrđena optužnica od strane Kantonalnog tužilaštva u Zenici zbog krivičnog djelovanja i nesavjesnog rada u službi. Iz svega navedenog se vidi da Načelnik nesavjesno i neodgovorno obavlja funkciju koja mu je povjerena od strane građana. Zbog svega navedenog Klub vijećnika SDA poziva vijećnike u Općinskom vijeću Maglaj, da preuzmu odgovornost i podrže inicijativu i na taj način zaustave daljnu destabilizaciju naše općine. Hvala.

Predsjedavajuća Aida Bašić: Hvala gospodine Abdurahmanović, gospodin Bešić izvolite.

Vijećnik Mustafa Bešić: I ja bih vas sve poselamio i pozdravio. Evo došli smo danas ovdje, evo vidimo kakva je situacija, kakvo je stanje, inicijativa pokretanja postupka opoziva Načelnika. To je samo jedna farsa, ja u ću svoje ime iznijeti stav. Poznavajući Općinskog načelnika, poznajem ga i kao vijećnika i kao insana i kao čovjeka i kao Načelnika. Govorim sad kao što sam i rekao u svoje ime i u ime svoje mjesne zajednice. Dolaskom Načelnika na mjesto Općine Maglaj, moja mjesna zajednica je progladala. Znači bili smo toliko zapostavljeni, pa jedno 15 godina nismo imali ništa. Njegovim dolaskom, to možete potvrditi, ljudi i mještani gore da vidite kakvo je sada stanje i situacija. Imamo obavezu i potrebu da kažemo za ovog načelnika. Mene ne interesuje neka radi tužilaštvo svoj posao, ako je načelnik kriv neka odgovara ali za ove stvari dok je on na stolici Načelnika. Nije samo za moju mjesnu zajednicu, nego za komplet općinu Maglaj dešavaju se krupne stvari. Evo samo ako uzmemo pokazatelj unazad godinu kako je kad je vlast bila u kantonu, koliko je samo upumpano sredstava u općinu Maglaj. Ja bih volio da ova vlada i ovi donesu isto tako para za ove 3 godine. Ovdje ništa kolegama iz SDA, oni imaju pravo to ali ja moram iznijeti stavove i činjenice sa svog gledišta. Načelnik ima punu podršku i vjerujte, u jednu mi ruku žao što ne bi došlo do opoziva, da vide kolika je snaga da se izvaže to. Ovo ću da ponovim, načelnik je na prethodnim izborima dobio 6.100 glasova, to je jedna većina. Ja ne znam je li i jedan načelnik ako griješim ispravite me do sada dobio tu podršku. S tim imam dužnost i obavezu sa svoje strane da iznesem činjenice i istine. Načelnik radi kvalitetno i dobar posao ali šta još hoću da kažem, imamo u idućoj godini akobogda izbore ponovo i da sastavimo u jednoj godini dvoje izbore to bi koštalo Općinu i stanovništvo velika sredstva. Bolje da se uloži negdje sredstva, da se popravi neki put, voda, infrastruktura a narod će pokazati na sljedećim izborima je li on dobro radio ili nije.

Toliko eto od mene ima podršku toliko, hvala.

Predsjedavajuća Aida Bašić: Hvala gospodine Bešić, gospoda Zamboni izvolite.

Vijećnica Svjetlana Zamboni: I ja vas sve srdačno pozdravljam, evo kolega Bešić je iznio dio svog razmišljanja, ja ću isto tako kao vijećnica se osvrnuti na jedan dio izlaganja predsjednika Kluba SDA, kad aje napomenuo destabilizaciju općine Maglaj. Govorimo o općini koja je u vrijeme preuzimanja mandata 2016. godine imala Budžet od nekih 5 miliona maraka a danas ćemo imati priliku da pričamo o 13,5 miliona. Pa evo neka i građani sami procijene dakle samo omjerom vrijednosti budžeta u ovih 7 godina koliko je Općina destabilizovana.

Predsjedavajuća Aida Bašić: Hvala gospodo Zamboni. Gospodin Šehić izvolite.

Vijećnik Senad Šehić: Ja se neću puno osvrnati kada je u pitanju argumentacija SDA koju su iznijeli vezano za ovu inicijativu. Naravno njihovo je puno pravo, inicijativa je po Statutu i Poslovniku našla svoj put do Dnevnog reda. Ja ću generalno reći nekoliko stvari o samim manjkavostima Izbornog zakona koji se odnosi na ovaj član vezano za inicijative, odnosno pokretanje opoziva. Dakle ono što ja smatram dakle inicijativne generalno služe kao mehanizmi za obračunavanje sa pojedincima u ovom slučaju sa načelnicima, tako da stoji sa druge strane načelnik koji dolazi iz SDA ili DF-a nebitno, smatram da je na neki način malo i nepravdano. Inicijative dolaze na Dnevni red ne voljom nezadovoljnih građana, dakle nije u pitanju nikakav vid ni peticije, ni slično nego sad vam kažem to su većinom izraz nekakve volje, želje, ambicija članova, pojedinaca i određenih grupa. Ja bih baš u suprotno od kolege Adisa Abdurahmanovića pozvao sve vijećnike ovdje prisutne danas da razmisle malo svojom glavom i da ne glasaju za ovu inicijativu jer samim tim mi utičemo i na volju građana Maglaja. Ja ću se složiti sa kolegom Bešićem, pa još jednom ponoviti, pričamo o načelniku koji je dobio 5300 glasova 2016. godine pa 4 godine poslije 6100 glasova a ovdje odlučujemo mi o njegovoj sudbini. Generalno svi vijećnici, mi ovdje otprilike imamo nekih 150-200 svojih glasova sve ostalo se inercijom dobiva na stranačkim listama. Nekako kad bih i ja u svoje ime, kad bih o tome razmišljao da je s druge strane načelnik iz bilo koje druge stranke nekako bih se vodio time, ko sam ja da prekrajam volju građana.

Predsjedavajuća Aida Bašić: Hvala Senade, gospodo Hadžić izvolite.

Vijećnica Aida Hadžić: Evo ovako, kao vijećnik ispred DF Maglaj, moram da iznesem naše stavove. OO DF Maglaj uvažava razloge SDA za pokretanje opoziva Načelnika i ocjenjuje kao legitimno i sa dosta osnovanih argumenata iznesenih u prilog ovoj inicijativi. DF smatra da je od strane aktuelnog Načelnika u prethodna dva mandata načinjeno dosta grešaka, propusta u radu, netransparentnog i neplanskog rada i da prema zvaničnim izvještajima općina Maglaj stagnira u razvoju. Stojimo na stanovištu da aktuelni Načelnik svojim djelovanjem pogotovo u drugom mandatu narušio princip ravnopravnog razvoja mjesnih zajednica pri čemu je protežirao nekoliko njih a druge zapostavio. Načelnik je pokazao nedovoljnu potrebu da ulaže u projekte koji život znače za građane a to su pitanje vodosnabdjevanje grada i prigradskih naselja, realizacija projekata rješavanje energetskih učinkovitih načina problema centralnog grijanja, izgradnja mostova na Bijeloj Ploči, Ulišnjaku, zamjena kancerogenih azbestnih cijevi, te zamjena azbestnih krovova na stambenim zgradama. Sistem primarne zdravstvene zaštite i službe hitne medicinske pomoći tapka u mjestu godinama i osim uplitanja u kadovsku politiku pozitivne promjene se dešavaju uz pomoć donacija. Skoro ništa nije urađeno na sistemskom rješavanju i realizaciji strategije razvoja turizma općine Maglaj. Utvrđivanja dugoročnih ciljeva i nosilaca realizacije pa se ne zna ko je nadležan za upravljanje, održavanje i zaštitu kulturno historijskih spomenika na općini Maglaj niti se sistemski i planski pristupa razvoju i zaštiti prirodnih bogastava. Rad ustanova i preduzeća doveden je na rub propasti ili su pojedine ustanove prepuštene same sebi i stagniraju iz godine u godinu. Upravljanje građevinskim zemljištem kao značajnim i rijetkim bogastvom kojim raspolaže naša općina. Izrada prostornih i regulacionih planova je neekonomična, podilazi se pojedincima koji mogu da rade i grade bez poštivanja arhitektonskih i građevinskih normi. Normi zaštite okoliša i sigurnosti građana. Sistem socijalne zaštite se provodi na netransparentna način kada se radi o sredstvima iz budžeta, ne pokazuje se interes za poduzimanje mjera za bilo kakvim promjenama koje bi osobama u stanju socijalne potrebe osigurale adekvatnu pomoć i podršku, starim osobama, djeci sa posebnim potrebama, recimo asistencija u nastavi i slično. Jedna od rijetkih općina smo koja zavisi od donacija humanih pojedinaca i udruženja kako bi daci u stanju potrebe imali jedan obrok u školi. Ni jedna arhitektonska barijera nije uklonjena. U oblasti civilne zaštite posebno preventivnih mjera skoro da se ništa na terenu nije uradilo osim čišćenja manjih korita rijeka na nekoliko mjesta. Politički i partijski uticaji i samovolja su doveli do toga da je općina Maglaj postala predmetom presuda Evropskog suda za ljudska prava, sudova Federacije Bosne i Hercegovine a sve to na štetu budžeta kaop što je upitna politika naplate sredstava od poreza, taksi i naknada koje bi trebalo popuniti budžet a time biti i raspoređen na razvoj zdravstva, sport i ekologiju. Ovdje se

može još dosta toga nabrajati ali evo nama je samo žao što smo svjesni možda da vemenski ne možemo stići provesti svu ovu proceduru ali evo.

Predsjedavajuća Aida Bašić: Hvala gospođo Hadžić. Da li ima još diskutovanja? Gospodin Begić izvolite.

Vijećnik Jasmin Begić: Ja vas sve selamim i pozdravljam. Inicijativa za opoziv je opravdana je iz razloga tog, što smo čuli neke pogrešne informacije gdje Budžet koji je bio 5 miliona 2016. godine, te godine Budžet je bio 7 miliona, sad je 9 miliona. Za sedam godina dva miliona, dok su sve sljedeće općine ovdje oko nas u regionu i u kantonu zabilježile rast u 7 godina od 3,5 pa i 10 miliona povećanje budžeta. Ne treba građanima crtati, mi vidimo da je to opravdana inicijativa. Druga stvar što je rekao predsjednik Kluba SDP-a mi ovdje ocjenjujemo kvalitet rada Načelnika mi smo građani, mi smo predstavnici građana. Mi ocjenjujemo i mi donosimo ovdje Odluku hoće li biti opoziv, neće i kad će biti. Tako da je ova Inicijativa došla u pravo vrijeme, da se spasi budžet. Broj glasova će također će uvijek biti veliki zato što se i za ovaj budžet koji imamo ovdje na stolu je predviđena kampanja od 1.400.000,00 KM. Ja da imam kampanju od nekih 300.000,00 KM možda bih i ja pobijedio, ali milion i 400 uložiti u asfaltiranje po selima, po avlijama i svemu tome ja ne znam ko ne bi pobijedio. Zato je neophodno da spasimo budžet, da ta sredstva ne odu u te svrhe, da izglasamo opoziv i da građani imaju pravo ponovo odlučiti hoće li tog načelnika ili neće. Toliko.

Predsjedavajuća Aida Bašić: Hvala gospodine Begić, da li se još neko javlja za riječ? Nema, ukoliko nema više diskutovanja zatvaram raspravu. Pauza prije glasanja. Nakon pauze nastavljamo dalje. vezano za sam način glasanja o inicijativi imamo dvije mogućnosti, znači možemo glasati tajno i javno. Ja ću staviti i jednu i drugu opciju na glasanje. Ko je za tajno glasanje o inicijativi? Evo pauza?. Prvi prijedlog je da glasamo javno o Inicijativi? Ko je za?

Glasalo za : Svjetlana Zamboni, Elvir Arnautović, Jasmin Đuhera, Arif Mujkanović, Damir Bašić, Anida Šahman, Firuz Galijašević, Senad Šehić, Samir Fetić, Fikret Delić (SDP), Mustafa Bešić (samostalni vijećnik), Pero Mamić (HDZ BiH).

Glasalo protiv: Aida Bašić (NES), Aida Hadžić (DF), Elvir Vehabović (samostalni vijećnik), Maid Suljaković, Eldin Pehrat, Adis Abdurahmanović, Edin Salatović, Jasmin Begić, Safet Jašić, Mirsad Bejić, Eldis Kusr, Edin Osmić (SDA), Mirza Mešić (samostalni vijećnik).

Uzdržanih: Nema.

Ovim automatizmom bi bilo da glasamo tajno ali da ne bude sumnje, evo ko je za tajno glasanje o Inicijativi?

Glasalo za: Aida Bašić (NES), Aida Hadžić (DF), Elvir Vehabović (samostalni vijećnik), Maid Suljaković, Eldin Pehrat, Adis Abdurahmanović, Edin Salatović, Jasmin Begić, Safet Jašić, Mirsad Bejić, Eldis Kusr, Edin Osmić (SDA), Mirza Mešić (samostalni vijećnik).

Glasalo protiv: Svjetlana Zamboni, Elvir Arnautović, Jasmin Đuhera, Arif Mujkanović, Damir Bašić, Anida Šahman, Firuz Galijašević, Senad Šehić, Samir Fetić, Fikret Delić (SDP), Mustafa Bešić (samostalni vijećnik), Pero Mamić (HDZ BiH).

Uzdržanih: Nema.

Konstatujem da smo izabrali da tajno glasamo o Inicijativi o opozivu Općinskog načelnika. Ja ću zamoliti Eminu da izađe za govornicu i da nam pojasni dalji tok vezano za ovu tačku.

Emina Hasanić: Sve vas selamim i pozdravljam obzirom da izlazim prvi put. O inicijativi Općinsko vijeće se izglasava u skladu sa članom 89. Stav 1. Poslovnika o radu Općinskog vijeća Maglaj, u smislu gdje kaže da je glasanje javno ako Statuom ili ovim Poslovnikom nije drugačije određeno i vrši se dizanjem ruke, odnosno glasačkog kartona. Naime procedura izjašnjavanja o Inicijativi za opoziv nije propisana odredbama Poslovnika i Statuta, ukoliko Općinsko vijeće Maglaj odstupa od člana 89. stav 1. potrebno je donijeti Odluku o tajnom glasanju, onda utvrditi sadržaj odnosno pitanja na glasačkom listiću i odrediti Komisiju koja će provesti postupka tajnog glasanja.

Predsjedavajuća Aida Bašić: Hvala Emina, Odluka je pripremljena, glasački listić je pripremljen, ja ću zamoliti da vam se podijeli kako bi svi pročitali, vidjeli šta je i nakon toga ćemo se izjašnjavati o samoj Odluci. Moći ćemo i sadržaj same Odluke vezano za taj dio koji je Komisije

predložena, ako želite možemo taj dio da promijenimo. U materijalu stoji da je to Komisija za izbor i imenovanja.

Emina Hasanić: Ja se izvinjavam obzirom da su glasački listići odštampani i numerisani su brojevima, sada da ja ne dijelim vama. U samoj Odluci o tajnom glasanju stoji kako izgleda glasački listić a glasačke listiće ćete dobiti tek prilikom glasanja.

Predsjedavajuća Aida Bašić: Da listiće ćete preuzeti kod mene i napraviti ćemo kratku pauzu da pripremimo sve vezano za samo glasanje. Molim te Emina sada podijeli Odluku. Nakon što ste dobili Odluku, možemo ukoliko želite otvoriti raspravu o samoj Odluci koja je vezana za ovaj dio koji se odnosi na dio koji govori da će Komisija za izbor i imenovanje provesti postupak tajnog glasanja. Ukoliko neko ima potrebu da kaže nešto, da predloži neku promjenu. Mislim da je ta komisija evo i u punom je sastavu ovdje i ranije smo provodili neke procedure. Ukoliko nema nikakvih prijedloga za samu promjenu Odluke, ja ću Odluku ovako kako je pripremljena staviti na glasanje. Ko je za donošenje ovakve Odluke?

Glasalo za: Aida Bašić (NES), Aida Hadžić (DF), Elvir Vehabović (samostalni vijećnik), Maid Suljaković, Eldin Pehrat, Adis Abdurahmanović, Edin Salatović, Jasmin Begić, Safet Jašić, Mirsad Bejzić, Eldis Kusr, Edin Osmić (SDA), Mirza Mešić (samostalni vijećnik).

Glasalo protiv: Svjetlana Zamboni, Elvir Arnautović, Jasmin Đuhera, Arif Mujkanović, Damir Bašić, Anida Šahman, Firuz Galijašević, Senad Šehić, Samir Fetić, Fikret Delić (SDP), Mustafa Bešić (samostalni vijećnik), Pero Mamić (HDZ BH).

Uzdržanih: Nema.

Konstatujem da smo Odluku koju ste preuzeli, pročitali i vidjeli usvojili sa 13 glasova za. Ja bih sada da napravimo kratku pauzu, kako bi pripremili sve što treba da obavimo ovo kako treba. Nekih 20 minuta. Ako smo svi u Sali, nakon ovog kratkog sastanka Komisije za izbor i imenovanje, mi smo donijeli određene zajedničke, ne znam eto, dogovorili smo se u suštini, kako ćemo sve ovo provesti. Ovdje ima izbrojala je komisija zajedno, nas je 5 članova iz različitih političkih opcija da naglasim, 25 glasačkih listića, koji su numerisani ali su izmiješani, opečaćenji i ponuđena vam je opcija za, protiv i uzdržan. Glasat ćete tako da bi bilo ispravno, glasate zaokruživanjem samo jednog od ponuđenih odgovora i takav listić će biti jedini ispravan. Obzirom da smo donijeli Odluku o tajnom glasanju, nemojte da pokazujete glasačke listiće. Kada uđete u ovu pripremljenu kabinu, zaokružujete šta želite, presavijte ga i ubacite u kutiju. Također komisija se dogovorila da je potrebno da svi vijećnici izadu i da ispraznimo salu, da u Sali ostanu mediji, kako bi omogućili bez određenog pritiska da svako se izjasni o onome o čemu trenutno razgovaramo i glasamo. Komisija će ostati, kada završimo glasanje, ponovo ću vas pozvati u salu, sve će biti javno, transparentno. Komisija će pregledati, ima pripremljen zapisnik gdje će stojati rezultati glasanja. Ne znam ima li nešto nejasno. Želim da vam pokažem kutiju, kutija je prazna. Zaokruživanje će se vršiti sa pripremljenom hemijskom koja je druge boje od one koje vi imate. Kada budete prilazili, ja ću vam ovako naopako da ne vidim ni ja znači iz ove folije izvaditi vaš glasački listić. Samo molim komisiju da ostane ovdje. Nastavljamo dalje, evo poslije provedenog glasanja, rezultate samog glasanja će nam saopštiti predsjednik Komisije za izbor i imenovanja, gospodin Senad Šehić.

Vijećnik Senad Šehić: Još jednom vas sve pozdravljam. Prije svega zahvalio bih se naravno svim vijećnicama i vijećnicima, što su zaista svi korektno postupili i ispoštovali pravila koja je odredila Komisija za izbor i imenovanja koja je bila u sastavu Senad Šehić, Aida Bašić, Eldis Kusr, Elvir Arnautović, Elvir Vehabović. Ja u ime Komisije konstatujem da je proces glasanja zaista protekao u najboljem redu. Rezultati su sljedeći dakle nemamo nevažećih listića. Ukupno je 25 vijećnika imalo pravo glasa. 11 vijećnika je glasalo za opoziv, 12 vijećnika je glasalo protiv te Inicijative i 2 vijećnika su bila uzdržana. To je to ukratko. Još jedno zahvaljujem se svima i naravno čestitam svojim kolegama u komisiji koji su bili zaista profesionalni. Hvala.

Predsjedavajuća Aida Bašić: Hvala Senade. Sve je proteklo u najboljem redu, pokazali smo da smo dovoljno zreli i da smo demokratski nastrojeni i na kraju krajeva ovo je izbor bio. Imali smo mogućnost da glasamo za, protiv i uzdržani. Na kraju svega, konstatujem da Inicijativa za opoziv Načelnika općine Maglaj nije dobila potrebnu većinu.

AD 2. Izvještaj o izvršenju Budžeta/Proračuna Općine Maglaj za period 01.01. – 30.06.2023. godine

Predsjedavajuća Aida Bašić: Prelazimo na tačku broj 2. Izvještaj o izvršenju Budžeta/Proračuna Općine Maglaj za period 01.01.-30.06.2023. godine. Otvaram raspravu i pozivam uvodničara da nam se obrati. Senada izvolite.

Senada Alibajraktarević: Selamim i pozdravljam sve prisutne. Evo pred nama je Izvještaj o izvršenju Budžeta za period 01.01.-30.06. 2023. godine. Pravni osnov za donošenje ovog Izvještaja je u članu 96. Zakona o budžetima Federacije Bosne i Hercegovine, članu 13. Zaona o principima lokalne samouprave i članu 18. Statuta općine Maglaj. Kao što ste mogli vidjeti u materijalu, prihodi i primitci za ovaj period izvještavanja izvršeni su u iznosu od 4.778.671,66 KM u procentu od 49,76%. Kad aje riječ o razhodima i izdacima za ovaj period oni su izvršeni u iznosu od 4.015.344,55 KM ili 41,81 % u odnosu na godišnji plan. Što se tiče tekuće budžetske rezerve ona za ovaj period izvještavanja nije trošena, stanje novčanih sredstava sa 30.06.2023. godine iznosi 4.870.148,47 KM. kada posmatramo ovaj period izvještavanja ukupni suficit je iznosio 969.416,44 KM a tekući suficit 763.327,11 KM. U materijalim ste dobili detaljno obrazloženje svih stavki vezano za ovaj Izvještaj, još bih samo u uvodnom izlaganju napomenula da je kod kucanja došlo do permutacije naziva na pozicijama 613700 i 613711, tako da na poziciji 613700 treba da stoji naziv Izdaci za tekuće održavanje zgrade Općine, opreme i vozila a na poziciji 613711 treba da stoji naziv izdaci za održavanje zgrade za socijalno ugroženo stanovništvo. Pto se tiče brojke one se nisu ništa mijenjale. Toliko u uvodnom izlaganju pa ukoliko bude nekih dodatnih pitanja, stojim na raspolaganju.

Predsjedavajuća Aida Bašić: Hvala Senada. Otvaram raspravu, da li se neko javlja za riječ. Nema diskutana, zatvaram raspravu. Pauza na zahtjev Kluba SDA. Kao što vidite, sjednicu je napustila trenutna koalicija, pošto sam i ja dio koalicije također ću napustiti sjednicu i samim time nemamo dovoljan broj vijećnika u Sali, nemamo kvorum za dalje glasanje. Sjednicu ćemo nastaviti u skladu sa Poslovníkom o radu Općinskog vijeća i nastavak će uslijediti u roku od 7 dana. Može izvolite Seade.

Vijećnik Senad Šehić: Samo ako može da znamo koji je razlog napuštanja sjednic, pošto ovo zaista nije uredu.

Predsjedavajuća Aida Bašić: Kao što ste vidjeli, vijećnici su napustili bez ikakvog obrazloženja.

Vijećnik Senad Šehić: Ima nas dovoljno da nastavimo sjednicu.

Predsjedavajuća Aida Bašić: Ja sam dio koalicije i rekla sam već. Hvala vam lijepo, u roku od 7 dana bit ćete obaviješteni o nastavku.

Zapisničar

Elza Gračić

